

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

La Filologjiche inte Federazion da lis organizacions da lis minorancis europeanis

La Societât Filologjiche Furlane e je jentrade inte Union Federâl da lis Nazionalitâts Europeanis (FUEN), la federazion che e lavore a pro da la tutele e promovion de identitât, de lenghe, de culture, dai dirits e da lis tradizions des minorancis europeanis e e da vôs a lis minorancis intes organizacions internazionâls, inte Union Europeane, intal Consei de Europe, intes Nazions Unidis e intal OSCE. Lis motivazions di cheste siele a son chê di rapresentâ la comunitât furlane - che e je la seconde comunitât lenghistiche taliane pal numar di personis che le fevelin - e la cussience che i dirits dal popul furlan a puedin jessi tutelâts miôr cu la colaborazion e il confront cun altris realtâts europeanis. La FUEN e cjape dentri passe 100 organizacions di 26 paîs europeanis in rappresentance da lis minorancis nazionâls, nazionalitâts e grops lenghistics autoctons da l'Europe. La amission da la Societât Filologjiche e je stade votade a la unanimitât di bande da la Assemblee dai delegâts di sabide ai 9 di Setembar, tal congrès anuâl da la FUEN che si è davuelt a Pécs in Ongjarie dai 7 ai 10 di Setembar di chest an. La Societât e je stade rapresentade dal diretôr, Feliciano Medeot, che ur à fevelât ai partecipants

La amission e je stade aprovade a Pécs in Ongjarie tal cors dal congrès da la FUEN



da la storie e da lis ativitâts principâls dal sodalizi: organizacion di events e iniziativis, ativitât editoriâl, gjestion da la biblioteche di riferiment pe comunitât lenghistiche furlane e dal Centri regionâl di documentazion, ricercje e sperimentazion didatiche pe scuele furlane (DocuScuele).

La adesion a la FUEN e rapresente un biel salt di cualitât no dome pe Societât Filologjiche, ma par dute la comunitât furlane: chest al è un puest di incuintri pes tantis comunitâts lenghistiche da l'Europe e di discussion di cetantis propuestis che dopo a vegnin presentadis tes diferentis sedis: Parlament european, Comission europeane e Consei d'Europe.

Dome a mieç dal confront cun altris realtâts da lis minorancis europeanis, i doi grancj grops da lis comunitâts slavics e gjermanichis, ma soreudt lis comunitâts lenghistiche che a partegnin ai non-kin-states, ven a stâi a lis minorancis lenghistiche che no si ricognossin in nissun stât nazionâl (tant che juste apont chê furlane, ma ancje i catalans e i

bascs in Spagne, i bretons in France e i ladins in Italie) si puedin imparâ lis buinis praticis, ma ancje la legislaçion di tutele e promovion salacor di podê impuartâ in Friûl Vignesie Julie. Pensin par esempli al teme dai dirits lenghistics, al ûs da la lenghe inte aministrazion publiche, tai mieçs di comunicazion, tal mont dal lavôr e massime ta chel da la scuele, element fundamentâl e determinant pe incressite di ogni lenghe. Il congrès anuâl da la FUEN e lis riunions periodichis dai diviers grops di lavôr a son ocasionis preseosis par cognossi chestis realtâts, i ponts di fuarce e chei critics di ognidune, minorancis lenghistics che paraltri a rapresentin sù par jù il 10% di dute la popolazion da la Union Europeane. A fasin part da la FUEN ancje diviersis organizacions in rappresentance di minorancis presintis sul teritori talian. Tra chestis o ricuardin la Südtiroler Volkspartei (SVP), la Union Slovene, la Confederazion dal lis organizacions slovenis in Italie (SSO), la Union dai slovens in Italie (SKGZ), la Union Generela dei Ladins dla Dolomites.

In Cjasa Ascoli

In mostre Ilustradôrs contemporanis dal Friûl

Insieme cu la partence dal cors pratic, joibe ai 26 di Otubar a lis 5 sotsere a Guriza si fasarà in Cjasa Ascoli la scree da la mostre "Ilustradôrs e ilustradôrs contemporanis in Friûl".

Di simpri la Filologjiche e colabore cun ilustradôrs e ilustradôrs furlan che tai agns a àn rincurât la grafiche di diviersis publicazions, e rivistis de Societât. Tal 2022 sedis artiscj a àn colaborât cu lis lôr oparis al Strolc furlan e al Lunari doprant tecnichis e stîi diviers che a rapresentin lis diviersis personalitâts: une iniziative che e fâs risaltà la vivarositât creative dal nestri teritori e la dimension pardabon internazionâl propri in grazie dal lengaç visif che nol à bisugne di traduzion

A saran esponudis lis oparis dai artiscj Emanuele Bertossi, Alessandra Cimadoribus, Oriana Cocetta, Sara Colautti, Alessandra D'Este, Alessandro D'Osualdo, Maria Ellero, Annalisa Gasparotto, Barbara Jelenkovich, Anna Mattiuzzo, Marisa Moretti, Pietro Nicolaucich, Federica Pagnucco, Silvia Pignat, Luisa Tomasetig, Pia Valentinis. Al presenterà la mostre Dani Pagnucco, che al à rincurât la mostre insieme cun Gabriella Bucco.

La mostre si pues viodile in Cjasa Ascoli fin ai 22 di Dicembar intai oraris che e je vierte la sede: di lunis a joibe 10.00-12.30 e 15.30-18.00 e il vinars dome la buinore da lis 10 a misdi e mieç.

A Guriza dai 26 di Otubar cul docent Gianluca Franco



CJASA ASCOLI, SEDE DA LA FILOLOGJICHE (FOTO SCLAUZERO)

Cors pratic di lenghe e culture furlane

La Filologjiche e organize a Guriza il cors pratic di lenghe e culture furlane che al tache joibe ai 26 di Otubar a lis 5 sotsere in Cjasa Ascoli, sede da la Filologjiche in vie Ascoli 1. "Al è un moment pardabon impuartant - al dîs il vicepresidente da la Societât pal Friûl di Jevât, Renzo Medeossi - no dome par imparâ il furlan, ma ancje par

cognossi argoments di culture e identitât furlane". E al va indevant: "Soredut a Guriza la lenghe furlane e je une da lis components di fonde de storie e de culture de citât e dal teritori, un dai elements che a àn puartât a la assegnazion dal titul di capitâl europeane de culture pal 2025 a Gnova Guriza e Guriza". Par chest Medeossi al rimarche che

"cognossi la lenghe furlane, e no dome talian e sloven, e je une oportunitât par capî miôr la identitât plurilenghistiche dal Gurizan". Il cors al larà indevant par 13 lezioni, une volte par setemane, simpri di joibe da lis 5 a lis 7 di sere. Lis lezioni a trataran argoments di grafie, gramatiche e imprescj linguistics informatics. Si fevelarà ancje di aspiets storicis, culturâi,

leteraris e da lis tradizions populârs. Il docent al sarà Gianluca Franco. A la fin dal cors al vignarà consegnât un certificât di frecuence a chei arlêfs che a varan partecipât a almancul il 70% des oris di lezione. Il certificât al è titul culturâl par jentrâ inte liste regionâl dai insegnants cun competencis di lenghe furlane. Par informazions e iscrizions clamâ o scrivi a la sede di Guriza (tel. 0481 533849, gorizia@filologicafriulana.it) o al ufici Formazion (tel. 0432 501598 interni 3, formazione@filologicafriulana.it), o ben cjalâ sul sît filologicafriulana.it. La iniziative e je inmaneade cul jutori da l'ARLeF Agenzie Regionâl pe Lenghe Furlane e da la Region Autonome Friûl Vignesie Julie.